


# Iers

Van Wikipedia

Dit artikel is gesjreve (of begós) in 't Mestreechs. Laes hie wie v'r mit de versjillende saorte Limburgs ómgaoen.

't **Iers** (otoniem *Gaeilge*, Ingels ouch wel *Gaelic*) is de Keltische taol die vaanaajds in Ierland gesproke weurt. 't Is, neven 't Sjots Gaelisch en 't Manx, ein vaan de drei Goidelische taole. 't Iers weurt mer door inkel tiendoezende lui es ierste taol gesproke, veural in 't weste vaan 't eiland; de dominante spreektaol in zoewel Noord-Ierland es de Rippubliek Ierland is 't Ingels (in zienen Iers-Ingelse vörm). Vööl mie lui kinne de taol evels spreke, veural umtot ze op sjaol verpliech weurt gegeve. 't Iers is officieel in de Rippubliek Ierland; in Noord-Ierland is 't erkind es minderheidstaol. Ouch is 't ein vaan de officieel taole vaan de Europese Unie.



De *Gaeltachtaí*: 't gebeed boe 't Iers nog inheims is. In de mieste gevalle is 't neet mie de taol vaan de mierderheid.

## Inhawd

### Historie

### Grammair

Morfologie

Syntaxis

Morfofonologie

### Klaanklier

### Dialekte

### Spelling

### Extern links

## Historie

't Iers stamp aof vaan 't Oerkeltisch. Wienie de Kelte nao Ierland zien gekoume is neet dudelek; woersijjnelek gebäörde dat vaanaof 600 v.Chr. geleidelek. Vaanaof de veerden iew nao Christus duke ogham-inscripties op. De taol vaan die inscripties steit bekind es *Primitief Iers*. De taol is feitelek zoe awwerwèts tot ze neet of koelek es Iers te herkinne vèlt; mesjiens waor dit allein 'n taol veur plechtege zaken en praotde de lui in 't daogs leve anders. In eder geval wijs alles trop tot 't eiland tege deen tied eintaoleg Keltisch waor.

Vanaof de zèsdén iew weurt in chriseteleke centra de volkstaol noe en daan opgesjreve. Dees taol neump me Aajdiërs en dit is welzeker es Iers te herkinne. De taol is nog vörmeriek, meh diverse vörm zien al goon samevalle of weure allein door hun mutaties oeteringehawwe (zuug onder). Vööl Aajdiërsé tekste gief 't neet, umtot 't mieste sjriefwerk in 't Latien woort gedoon. In deen tied brei ziech 't Iers taolareaol oet nao

Sjotland, boe 't terrein wint op 't Pictisch ('n oonbekinde, meh woersijnelek Keltische taol die dao inheims waor). Nao de stiechting vaan 't keuninkriek Sjotland in de negenden ieuw weurt Iers daan wel Gaelic in 't gans riek de veurtaol. Ouch op 't Eiland Man weurt 't Iers ingeveurd.

Vanaof d'n tienden ieuw sprik me vaan Middeliers. Dees taol heet minder vörm es Aajdiars, meh vööl belaankrieker zien diverse klaankveraanderinge. In 't Middeliers zien wel umvaankrieke tekste versjene. De taol is in dezen tied nog vrij uniform. 'tzelfde gelt veur 't Klassiek Iers. Dit waor de cultuurtaol vaan zoewel Ierland es Sjotland vaanaof de daartienden ieuw tot deep in de achtienden ieuw.

Nao de middeliewe mote Iers, Sjots Gaelisch en Manx dudeleker oeterein zien gegreujd. De politieke situatie had veur ummer mie isolatie gezörg. Oondaanks de Ingelse euverheersing heel 't Iers ziech iewelaank good. Allein in The Pale, e gebeed in Oos-Ierland boe ziech vööl Ingelse hadde gevesteg, had 't Ingels veuj aon de groond, en zelfs dao veriersde de bevolking deils. De ierste groete veraandering waor de kolonisatie vaan Ulster in de zeventienden ieuw. De Sjotse koloniste naome hun eige Sjots dialek mèt, wat in de loup vaan d'n tied evolueerde tot Ulster-Sjots. De groeten umslag kaom in d'n achtienden ieuw: noe pas begós 't Brits bewind de Ingelse taol officieel te promote. Zeker 't ooste vaan Ierland veringelsde zoe vrij snel, umtot 't spreke vaan dees taol groete sociaol veurdeile booj. Vaanaof ongeveer 1800 waor 't eiland in mierderheid Ingelstaoleg. Dezen trend góng in de negentienden ieuw door: ummer mie sjaole woorte eintaoleg Ingels en vööl intellectuele wezen 't Iers aof. Vaan groeten invloed waor ouch d'n Iersen Hoongersnoed vaan de jaore 1854-52. Doeze lú zjus in de Ierssprekende gebeje gónge doed, en hiel vööl vaan de euverlevende emigreerde nao de Vereinegde Staote en Canada. Zoedoende is de taol nog 'nen tied in Newfoundland gesproke.

De negentienden ieuw waor evels ouch 't memint tot 't Iers nationalisme opkaom. Vööl nationaliste (zij 't neet allemaol) kaome op veur de taol. Ouch in dezen tied raakde 't klassiek Gaelisch definief zien positie kwiet aon 'ne nuie standaard, dee ziech mie op de Ierse volkstaol baseerde.

Nao de oonaofhenkelekheid vaan de Ierse Vriestaot (erkind in 1922) perbeerde de regering vaan 't land de Ierse taol oet alle mach te behawwe en zoe meugelek 't Ingelstaoleg bevolkingsdeil ouch te doen verierse. 't Iers woort de inegste officieel taol, en in gans 't land mós officieel communicatie in 't Iers. De maotregle wèrkde woersijnelek averechs: vööl awwers waore engsteg tot hun kinder neet good Ingels zouwe liere en brachte hun dees taol bij. 't Gebruuk vaan de taol leep jaor nao jaor trök. In 1956 woorte de Ierstaolege gebeje bij wèt vasgestèld. In de zoegenaomde *Gaeltachtaí* woort de taol gepromoot; daoboete waor ouch Ingels touwgestande. Viefteg jaor later waore de Gaeltachtaí al sterk veringels. Mer e paar klein enclave, in 't dunbevolk uterste weste vaan 't land, waore euverwegend Ierstaoleg gebleve, in dee zin tot 2/3 vaan de bevolking of mie 't ederen daag spraok.

De kans tot de taol gans zal verdwijne is klein. 't Iers weurt gezeen es oonmisbaar deil vaan de Ierse identiteit en vööl lui lieren 't um die rei aon. In vööl plaotse in Ierland - in Dublin, meh ouch in de Noord-Ierse hoofstad Belfast - zien ganse Ierstaolege kolonies en subculture die de taol levend hawwe. De touwkoms vaan 't traditioneel Iers in de lèste Ierstaolege dörpsgemeinsjappe is evels zier oonzeker.

## Grammair

---

### Morfologie

't Iers is 'n flecterende taol mèt veer naomvalle: nominatief, genitief, datief en vocatief. Zelfstandege naomwäörd valle in twee geslachte (mannelek en vrouwelek) en kinne inkelvoudeg of miervoudeg zien. In de standaardtaol is d'n datief gemeinelek geliek aon de nominatief, dewijl de vocatief allein versjèlt door de

mutatie aon 't begin (e woord in de vocatief heet geinen eigen oetgaank). Werkwäörd weure verveug mèt 'n combinatie vaan synthetische en analytische vörm; me kint 'nen tegenwäördege, 'ne verleie en 'nen touwkoumenden tied.

## Syntaxis

In tegestèlling tot de Germaanse taole euverheers in 't Iers de volgorde WOV (Ingels VSO); 't werkwoord kump dus aon 't begin vaan de zin.

## Morfofonologie

Wie alle modern Keltische taole kin 't Iers mutaties aon 't begin vaan 't woord. Dat wèlt zègke tot de ierste lètter vaan e woord veraandert oonder d'n invlood vaan 't woord wat deveur kump. Dit is historisch oontstande door progressief assimilatie euver de woordgrens heer. 't Kump dus trop neer tot de lèste lètters vaan e woord, die op ziech zien verdwene, noe in 't volgend woord zitte.

Twie hoofmutaties zien meugelek: verweiking (Iers: *séimhiú*, Ingels *lenition*) en verduustering (*urú*, *eclipsis*).

Bij verweiking veraandere veural plosieve (plofklaanke) in fricatieve (vriefklaanke) of soms in 'nen [h]-klaank. Ouch aander lètters weure dao-in betrokke. In de Ierse spèlling gief me de verweiking aon door 'n *h* achter de betroffe consonant te zètte.

Bij verduustering veraandere stumloes consonante in stumhöbbende. Stumhöbbende plosieve weure nasaole. Aander lètters weure neet door verduustering getrofte. Verduustering gief me vädal aon door de nui lètterweerde veur de oersprunkeleke te zètte. Dit is altied 'n klein lètter, ouch es 't groondwoord mèt 'n hooflètter is. Dees regel weurt zelfs in opsjifte die gans oet hooflètters bestoon in ier gehawwe. Eventueel kin me daan 'ne klein-kapitaol gebruke.

Dit alles zuut in 'n euverziech zoe oet (de IPA-weerdens zien geldeg veur 't Standaardiers). Lèt op de typische, oonregelmaotege weerdens vaan *th* en *dh*.

Groondklaank	Verweiking	Verduustering
<i>p</i> [p <sup>v</sup> , p <sup>j</sup> ]	<i>ph</i> [f <sup>v</sup> , f <sup>j</sup> ]	<i>bp</i> [b <sup>v</sup> , b <sup>j</sup> ]
<i>t</i> [t <sup>v</sup> , t <sup>j</sup> ]	<i>th</i> [h]	<i>dt</i> [d <sup>v</sup> , d <sup>j</sup> ]
<i>c</i> [k, c]	<i>ch</i> [x, x <sup>j</sup> ]	<i>gc</i> [g, ʃ]
<i>b</i> [b <sup>v</sup> , b <sup>j</sup> ]	<i>bh</i> [w~v, v <sup>j</sup> ]	<i>mb</i> [m <sup>v</sup> , m <sup>j</sup> ]
<i>d</i> [d <sup>v</sup> , d <sup>j</sup> ]	<i>dh</i> [ɣ, j]	<i>nd</i> [n <sup>v</sup> , n <sup>j</sup> ]
<i>g</i> [g, ʝ]	<i>gh</i> [ɣ, j]	<i>ng</i> [ŋ, ɲ]
<i>s</i> [s <sup>v</sup> , ʃ]	<i>sh</i> [h]	oonveraanderd
<i>f</i> [f <sup>v</sup> , f <sup>j</sup> ]	<i>fh</i> [Ø]	<i>bhf</i> [w~v, v <sup>j</sup> ]
<i>n</i> [n <sup>v</sup> , n <sup>j</sup> ]	oonveraanderd	
<i>m</i> [m <sup>v</sup> , m <sup>j</sup> ]	<i>mh</i> [w~v, v <sup>j</sup> ]	oonveraanderd

Nog e verhaol apaart zien mutaties bij wäörd die mèt 'ne klinker beginne. Verweiking heet dao gein effect, verduustering wel: 't woord begint daan mèt 'n *n*. 't Gief nog twie aander mutaties die allein of veural bij klinkers veurkoume: h-prothees en t-prothees. Dit hêlt in tot veur 't woord 'n *h* daan wel *t* weurt gezat. H-prothees is typisch veur klinkers, t-prothees trejt ouch op bij wäörd die mèt 'n *s* beginne.

'n Touwgeveugde *n*, *h* of *t* weurt ouch weer ummer klein gesjreve (*na hEirann*), zjus wie bij de verduusterde consonante.

## Klaanklier

---

Ziers Iers is 't versjèl tösse gepalataliseerde en neet-gepalataliseerde consonante, of in 't Keltisch taoljargon 'breid' (Iers *caol*, Ingels *broad*) en 'smaal' (*leathan*, *slender*). Veurbeelde daovaan zuut me in de tabel heibove: de mieste consonante hōbbe twie weerd, breid en smaal.

Brei consonante trejje op in de buurt vaan achterklinkers (*a*, *o*, *u*), smaal consonante in de buurt vaan veurklinkers (*e*, *i*). Typisch veur 't modern Iers is tot de brei en smaal consonante nog wijer gepolariseerd zien es in 't Aajdiers. Heidoor weure brei consonante gevelariseerd, mèt 'ne zwake g-klaank (wat in 't Sjots Gaelisch en Manx neet gebäört). Me moot ouch trop lètte tot de brei variante coronaol consonante (*t*, *d*, *s*) ummer dentaol (op de *tan*) weure gearticuleerd, um ze nog beter vaan hun smaal tegenhengens te kinne ondersjeie.

't Iers heet 'n aontal lang klinkers, korte klinkers en twieklaanke; welke versjèlt per dialek. Lang klinkers weure euver 't algemeen mèt 'n accent aigu gesjreve. De *o* en *a* weure soms neet oetgesproke; ze hōbbe daan allein es functie um aon te geve tot de veurgoonde daan wel volgende klinker breid is. 'n Vergelijkbaar functie hōbbe soms de *e* en de *i*, die kinne aongeve tot 'ne mètklinker gepalataliseerd en dus smaal is.

## Dialekte

---

De Ierse dialekte versjèlle aonzeenlek, zoewel op 't gebed vaan grammair es vaan klaanklier. Groete versjèlle gief 't beveurbeeld in de oetspraak vaan veurmaolege twieklaanke en in de vörming vaan werkwoordsvorm (synthetisch of analytisch). Drei hoofdialekte weure ondersjeie, 't Ulster-Iers, 't Connaght-Iers en 't Munster-Iers. In Leinster, 't veerde historisch deil vaan Ierland, is 't traditioneel dialek oetgestorve; dialekte oet Leinster die door awwer onderzoek bewoerd zien gebleve, deilt me dèks bij ein vaan de drei hoofgroe in.

't Standaardiers baseert ziech in de ierste plaots op 't Connaght-Iers. In weze is dit evels 'ne kunsmaotege taolvorm dee allein weurt gesproke boete de Gaeltachtaí, door lui die 't op sjaol hōbbe gelierd.

## Spelling

---

De Ierse spelling is gebaseerd op 't Klassiek Gaelisch en geit oetindelek trök op 't Aajdiers. In alle vorm vaan Iers (oetgezunderd 't Primitief Iers) weurt ingezet rekening gehawwe mèt de mutaties, de klinkerlengde en de brei en smaal consonante. Oondaanks dat - en oondaanks 'n spellingshervörming in d'n twintegsten ieuw - is de Ierse spelling veur wee de taol liert soms lesteg te verstoon. Dit kump deils doortot me rekening wèlt hawwe mèt de dialekvariante.

Vaanajds weurt 't Iers gesjreve in 't Iers unciaolsjrif: 'nen typerende lèttervorm dee in vreugmiddeliuwe handsjrifte oontstoont. Deze vorm maak gei formeel versjèl tösse hooflètters en klein lètters (dus allein door lèttergruutde, neet in vorm). Verweiking weure neet mèt 'n *h* aongegeve, meh door e puntsje bove de lètter.

Δ b c d e f g h i l m n o p r s t u  
 Δ b c d e f g h i l m n o p r r s t u  
 a b c d e f g h i l m n o p r s t u  
 aw bay kay dhay ey eff gay hh ee ell emm nn oh pay arr es thay ou

Lenited consonants

b̃ c̃ d̃ f̃ g̃ m̃ p̃ r̃ t̃  
 bh ch dh fh gh mh ph sh th

## Extern links

- Foras na Gaeilge (<http://www.bnag.ie>), de instantie die de Ierse taal regelt.



D'r is 'n **Ierse editie** van Wikipedia, de vriej encyclopedie.

Aafkomstig van Wikipedia, de Vriej Encyclopedie. "<https://li.wikipedia.org/w/index.php?title=lers&oldid=429375>"

**Dees pazjena is 't lèts verangerd op 2 okt 2018, 19:50.**

De teks is besjikbaar ónger de [Creative Commons Naomsvermelding/Geliek Deile](#) licentie. 't Is mäögelik dat aanvöllende veurwaarde van toepassing zeen. Betrach de [Algemein veurwaarde](#) veur mie informatie.